

古典文學 第二名 溫仲斌

個人簡介：臺北大學中國文學系四年級

香港僑生，曾獲第 34 屆中興湖文學獎古典文學類第三名。

未濟存稿

題鄧卓然所臨禮器碑

人生識字憂患始，東坡一言貫我耳。吁嗟乎！雖無能事諧流輩，讀書吟詩何可已。彼何人哉！彼何人哉！亦知吾道故如此。富貴浮雲非吾願，平生所樂惟故紙。有子有子名卓然，非為交深然我言。矧傳家學自少小，道在斯人重仔肩。初我學書苦無依，羨君喜得博士師。況復文字義理皆爛熟，視彼書匠猶癡兒。輕浮疇昔師責我，八分摩崖宜作佐。今君初入自厚深，免使臨池失足墮。宗廟璣璣之禮器，君於此道亦云哿。聞道邇來學為詩，文心當作白雪詞。書家近日但抄皇琴曲，魯魚亥豕又無疑。噫，君莫笑，君莫笑，亦知吾道故如此，彼何人哉但豎子。成名一朝將何用，尚有傳之萬世不朽之青史！

二月十五日渡臺留別

謔語舒顏總不宜，離懷況復雨絲絲。纔春二月歡曾罷，如夢佳期事可疑。雖及紅櫻看海國，已無留者枉花時。排雲一往從茲別，夜夜孤燈有所思。

連夜校讀五石瓠齋詩文集敬題其後

五十年前垂斷絕，況今廣宇已頽傾。世矜瓦釜將焉用，詩近曾黃空有名¹。往日趨庭應料此，先生之作殆堅城²。他朝人物更嗟換，長夜寥寥望月明。

夜雨感舊

夜來一枕荒唐雨，長憶當時懵懂雲。未夢已醒猶昨日，纔晴乍雨更無因。依稀明月林間路，宛轉空香婪尾春。與影徜徉只吾事，蕭蕭黃葉尚因循。

一九九年元旦試筆

羈居三載強，久已自郎當。出戶可誰詣，鍵關且主張。書生尚饒舌，山氣漫清涼。一卷南華裏，光陰爾許長。

西湖謁岳墳即次晦聞先生韻

西湖雙塚故堂堂，風雨於今益莽蒼。豈意蛟龍愁水失，亦知此事要弓藏。羌胡未滅竟先死，山水為賓空作王。不必迢迢憑弔去，一謳歌曲已堪傷。

¹ 曾：曾剛甫；黃：黃晦聞。

² 山谷詩：「句法提一律，堅城受我降。」

登高

廣武傷時淚，登高一悵然。江湖容獨往，花月不新鮮。
絕頂塵難到，四圍山可憐。大鵬從此起，容易去無前。

嘉義途中寄答友人

選堂不過百年耳，何用千萬老不死。不死於今徒寂寞，養生還看子鄧子。他年吾死子猶存，雖有佳餚食豈旨。百年牢落空皮相，古人夜遊良有以。況乃今朝青天白日好，登高懷遠勞屐齒。掉臂堂堂乘興來，看花賞月聊復爾。君不聞詩酒泉明蚤有言，孤雲去去知何似。又不聞揚州一夢杜司勳，冰底奔流何時已。噫，知君莫如我，知我復誰是。君壽千萬年，吾崖欲有涘。想君此時定攤飯，吾車已過雲林市。

題自畫老杜秋興詩意圖

乾坤早已負儒冠，入世心肝歲又寒。暫向江湖安釣艇，秋來無事且加餐。

芳時

芳時已盡無由見，賸得餘花恐亦殘。五夜秋燈逗孤影，一簾疏雨入初寒。
已拚他日傷春淚，為灑心頭並蒂蘭。夢過西園臺下路，飛紅成陣却羞看。

朱古微書孝子趙君墓表跋

韓昌黎曰：「餘事作詩人。」而書者小藝，則又詩之餘也。是以古之善書者，以其小藝餘事，不屑屑以要時譽，人亦不以之掩其文名。故初有無意於佳書而無不佳焉者，蓋書雖小藝餘事，固不無可觀足為娛者，況平日所資用者乎。朱古微先生，一代詞宗也。余於書肆偶見此本，驚覺其書之佳，但旋不怪焉，蓋古之學者之書無不佳也，第為文名所掩耳。今之人目書法為藝術，特標舉之，故有以書名掩文名者矣。況今之人能為古人之餘事者，亦幾希矣，能無慨乎？此先生殉前一年之作，純乎顏體，不躁不厲。而詩人學者之書，尤可寶也。歲次戊戌玄月，時客臺灣無何有之齋。